

Noticia
Transparente
di Gobierno

ISLA ONLINE

Diaranson 3 Juli 2024

Email: IslaOnline@gobierno.aw Tel: 528-4952

ARTE DI MURAYA
SAN NICOLAS



**STABILIDAD
Y
PROSPERIDAD**

2 0 2 4



Gabinete Wever-Croes



PROME MINISTER A REUNI CU DRH RIBA PROYECTO DI RESTRUCTURACION DI E APARATO GUBERNAMENTAL



Diaranson, 3 di juli, Prome Minister Evelyn Wever-Croes a reuni cu e ekipo di Departamento di Recurso Humano (DRH) cu ta encarga cu e proyecto di restructuracion di e aparato gubernamental.

E proyecto aki ya ta andando pa un tempo caba y na e momentonan aki ta bayendo den pasonan mas concreto. E restructuracion di e aparato gubernamental ta consisti di diferente paso y ta basa riba un raport cu recomendacionnan di PricewaterhouseCoopers Hulanda (PwC) ken a haci un investigacion riba esaki. Esaki ta muestra riba tareanan cu Gobierno ta haciendo y cu no mester haci mas y cua ta e tareanan cu Gobierno mester haci y no ta haciendo aworaki, y cua ta e miho structura pa agrupa e tareanan miho posibel den e aparato gubernamental.

A base di e recomendacionnan di PwC, awor DRH (Departamento di Recurso Humano) ta dunando esakinan un contexto local cu ta un contexto mas realistico y mas realisabel pa Aruba. Den esaki por mira por ehempel e ministerionan, pa no tin ministerionan cu ta cambia cu cada gobernacion pero tin un structura fiho di e ministerio, e asina yama 'domein'.

Prome Minister ta menciona cu si por ehempel, den e Ministerio di Infraestructura, tur departamento cu tin di haber cu Infraestructura ta keda den e famia di Infraestructura. Esaki no



lo cambia durante un formacion di un gobierno nobo, evitando cu na e momento ey cada ministerio ta pidi e departamento cu nan ta desea. Y den e domein, por ehempel di Infraestructura por mira kico ta e tareanan cu DOW, DIP y Kadaster ta haci cu ta similar pasobra por mira cu tin hopi cu ta overlap otro. Akinan ta uza e similaridad di e tareanan y organis'e na e miho manera.

"Un proyecto enormemente grandi y awe mi a cera conoci cu e ekipo nobo cu ta haciendo e tarea aki. Mester bisa cu e presentacion tawata hopi interesante y e ta den un contexto local y realisabel. Awor ta sigui conversacionnan cu diferente departamento y despues di esey nan lo ta cla pa presenta e proyecto. Na Augustus-September 2024 nos kier tene un reunion cu tur hefe di departamentonan di Gobierno y pa e tempo ey nos lo presenta e structura nobo. Mi ta desea e ekipo hopi exito cu e trabou importante aki pa pais Aruba", Prome Minister a remarca.

Prome Minister Evelyn Wever-Croes: **Prome Minister a atende graduacion di EPI facultad Salubridad y Servicio** **DANKI EPI PA BOSO DEDICACION Y TRABOU** **VALIOSO NA E FUNDESHI DI NOS MUCHANAN**

Diamars anochi den e ballroom di Aruba Marriott Resort & Casino a tuma luga e graduacion di e studiantenan di EPI, facultad Salubridad y Servicio. Prome Minister Evelyn Wever-Croes tabata presente na e evento aki, compartiendo asina e momento bunita aki cu e graduadonan. E mandatario a expresa cu e temporada aki ta uno hopi bunita pasobra ta e temporada na unda nos por celebra tur e añanan di dedicacion di e hobennan aki pa culmina nan estudio exitosamente.

Manera ta conoci, EPI ta e scol mas grandi di MBO cu tin na Aruba, y ta na unda nos hobennan ta haya e preparacion necesario pa por drenta e mercado laboral exitosamente. Sigur un joya di facultad cu ta yuda nos hobennan desaroya nan mes pa por ocupa posiconnan importante den futuro. E facultad di Salubridad y Servicio ta prepara e muchanan pa duna un miho servicio na comunidad en general, y na tur e bishitantenan, y esaki ta algo cu tur hende directamente of indirectamente ta beneficia di dje.

"Den nomber di Gobierno di Aruba, mi ta gradici EPI no solamente pa e invitacion sino tambe pa nan dedicacion y trabou na e fundeshi di nos hobennan. Tambe mi ta gradici e mayornan pa tur e sosten cu nan ta duna na nan yiunan pa asina nan por logra caba nan estudio. E tabata un anochi hopi bunita y emocionante pa wak e alegria y satisfaccion cu cada graduado tabata refleha. Masha pabien na tur e graduadonan y hopi exito den futuro", Prome Minister a expresa. ■■■





MINISTER DI TURISMO TA FELICITA PARADISE BEACH VILLAS CU SU 30 AÑA DI ANIVERSARIO

Minister di Turismo y Salud Publico sr. Dangui Oduber a atende un bunita ceremonia diamars anochi pa e celebracion di 30 aniversario di Paradise Beach Villas (PBV). PBV ta un hotel hopi conoci pa su caracteristicanan intimo cu ta enfoca especialmente ariba famia y cu ta situa solamente algun paso dilanti e famoso Eagle Beach.

Durante e 3 decadanan, Paradise Beach Villas a keda cu e compromiso di ta un hotel di bon calidad, bon servicio, bon experiencia y un bon bista pa nos bunita lamanan. E exito di Paradise Beach Villas ta un testimonio di e trabou duro y e pasion di e personalnan.

Minister Oduber ta comenta cu Paradise Beach Villas ta uno di e tiki timeshare hotelnan cu tin na Aruba y cu a recupera bon bek despues di e pandemia. Mientras cu nos ta celebra e logro aki, nos tin cu mira dilanti tambe. E industria di turismo ta continuamente evolucionando y pa es motibo aki, PBV tambe a wak e necesidad di inova y renoba su cambenan y tambe a construi un gym nobo y a informa cu tin hopi mas cambionan na caminda.

Pa finalisa, Minister Dangui Oduber kier extende su felicitacion na ful e ekipo di Paradise Beach Villas y muy en especialmente, sra. Esther Lacle, un empleado ehemplar di PBV cu tambe a celebra su lealtad di ta laborando pa 30 aña na Paradise Beach Villas.



No por keda sin duna un agradecimiento na tur e timeshare owners cu ta scohe Aruba como nan destinacion preferi y Paradise Beach Villas como nan cas leu foi cas. ■■■



"ONLINE BUSINESS WORKSHOP" CU INFORMACION VALIOSO PA INVERSIONISTANAN POTENCIAL



Riba 2 di Juli 2024, a tuma lugar un tayer online via Microsoft Teams, cual a toca e tema: "Tax Considerations for Dutch Investors". E tayer aki ta un di e serie di evento despues di e Aruba Investment Summit maart ultimo na Hulanda. Un evento organisa pa minister Geoffrey Wever cu e meta principal pa atraer mas inversionista na nos isla, specialmente den e area di agricultura comercial como tambe inversion den centro di Oranjestad y San Nicolas.

E sesion informativo aki, facilita pa EY Dutch Caribbean, a ser organisa pa ministerio di Asuntonan Economico conhuntamente cu e unidad di ARINA (Aruba Investment Agency). ARINA, institui no mucho tempo pasa pa Minister Geoffrey Wever, su meta ta pa yuda guia inversionista potencial pa Aruba. Durante e workshop gratuito aki a duna un bista amplio riba e diferencia sutil entre e leyman fiscal aplicabel na Hulanda y na Aruba, como tambe e similaridadnan.

E tayer a provee informacion valioso na e participantenan. Algun topico cu a ricibi atencion durante e sesion aki tabata: Impuesto directo y indirecto, beneficioran fiscal y deduccion di

costo, aspectonan di inversion na Aruba, Regimen preferencial manera Freezone, Inversion sostenibel, Desaroyonan reciente den impuesto, pa menciona algun.

"Nos ta spera di por a brinda participantenan informacion necesario pa nan haci nan calculacionnan. Asina, nos por diversifica e "pool" di inversionista na Aruba. E apetito di inversionista ta varia entre paisnan. E beneficio di e diversificacion den inversion aki ta trece cune e expansion di experticio, y esaki ta contribui na esfuersonan directo y indirecto pa diversifica nos economia. E inversionista Hulandes ta conoci pa su experticio den HORECA y tambe agricultura comercial, y ta cu e enfoke aki nos a bai Hulanda cu'ne" minister Wever a comenta.

E speransa ta cu nan por considera Aruba un destinacion valioso pa inversion. Lo tene mas sesion informativo den futuro, y tambe lo percura pa amplia e grupo di interes. Danki na Sra. Anushka Lew Jen Tai y Sr Stefan van Riezen di EY Dutch Caribbean pa facilita e sesion.

Minister Geoffrey Wever:

OSTAD 200 INCUBATOR TA BRINDA UN OPORTUNIDAD GRANDIOSO Y UNICO NA (FUTURO) EMPRESARIONAN



Como Minister di Asunto Economico, Comunicacion, y Desaroyo Sostenibel, minister Geoffrey Wever a expresa su gratitud na e organizacion di OSTAD 200 Incubator. E OSTAD 200 Incubator ta un programa di mentorship y desaroyo empresarial, cual ta yuda esnan cu kier cuminsa ("start-up"), of crece ("scale-up") nan negoshi cu ideanan innovativo, yega nan meta. Como incentiva, tin un premio maximo di AFL 10,000 pa e ganador di e programa, den ambos categoria di Start-Ups y Scale-Ups.

Aruba ta experienciando un crecimiento economico significativo, esaki ta trece cune oportunidadnan nobo pa empresarionan. E periodo di expansion economico aki ta habri porta pa desaroyo nobo y innovacion den diferente sectornan. E programa OSTAD 200 Incubator ta un oportunidad perfecto pa capta e energia aki y pa contribui na crea un atmosfera unda ideanan creativo por bira realidad.

"Mi ministerio ta dedica na duna sosten continuo na e industria creativo, agricola comercial, y den tur aspecto di desaroyo sostenibel. Nos ta sostente iniciativanan cu ta yuda nos empresarionan chikito y mediano", minister Wever a declara. Trahando constantemente pa promove diversificacion economico, cual ta crucial pa fomenta "entrepreneurship" y sostenibilidad den e desaroyo comercial nobo.

Nos kier encurasha tur entrepreneur den accion of den curason, pa busca mas informacion di e programa OSTAD 200 Incubator. Esaki ta un oportunidad unico pa bo haña e



guia y sosten cu bo mester pa logra bo meta. "Mi ta kere cu e estimulo corecto, bo por como un empresario contribui na nos economia, comunidad y bo propio desaroyo personal", segun minister Wever.

"Danki na Impact Hub Aruba pa e iniciativa importante aki, y tambe na tur sponsors y colaboradornan cu a hasi esaki posibel: Camara di Comercio, Universidad di Aruba, SETAR, WEB, Aruba Hotel & Tourism Association, Aruba Tourism Authority, Ingenious Business Solutions, Qredits, Blue Vacation Rentals Aruba, y Bold Bizz. Boso compromiso y apoyo ta fundamental pa e garantisa exito di programa aki", minister Wever a expresa. Mi ta desea tur participante hopi exito!

Bishita www.ostad200.com pa mas informacion. Inscripcion ta habri te cu 3 di juli, 2024. ■■■



MINISTER GEOFFREY WEVER A DUNA PRESENTACION DI SUSTAINABLE DEVELOPMENT GOALS NA ALUMNONAN DI MARIA GORETTI SCHOOL



Den cuadro di e proyecto di Minister Geoffrey Wever di presentacion di e metanan di desaroyo sostenibel, e ‘Sustainable Development Goals (SDGs)’, na alumnonan di 6e klas di scolnan basico, e siman aki a bishita klassen 6 di Maria Goretti School. E scol a prepara tambe un bunita muestra di aprecio pa Minister Geoffrey Wever.

Di un manera interactivo Minister Wever a splica e metanan di desaroyo sostenibel na e alumnonan. E presentacion ta pa yuda cu conscientisacion di kico e metanan ta ensera y con cada un di nos por yuda na logra e metanan. For di e alumnonan tabatin basta interes pa e topico.

E Metanan di Desaroyo Sostenibel ta consisti di 17 metanan riba cual paisnan ta traha pa alcanza den nan contexto nacional. E metanan ta: 1. Caba cu pobresa; 2. Caba cu hamber; 3. Salud y bienestar; 4. Enseñansa di calidad; 5. Igualdad di genero; 6. Awa limpi; 7. Energia limpi y economico; 8. Trabou decente y crecemento economico; 9. Innovacion y infraestructura; 10. Reduci desigualdad; 11. Barionan y comunidadnan sostenibel; 12. Produccion y consumo responsabel; 13. Accion riba clima; 14. Bida bou awa; 15. Bida riba tera; 16. Paz, husticia y institucionnan formalisa; 17. Partnership pa logra e metanan.

Minister Geoffrey Wever: “Mi ta hopi contento y ta agradeci e cabesante, docentenan y alumnonan di Maria Goretti School pa a ricibi nos y pa e atencion special. Mirando cu e aña escolar ta cabando mi kier a alvast desea na tur e docentenan y alumnonan di basisscholen un bon vakantie y na e alumnonan hopi exito den scol secundario.”

E proyecto di Minister Geoffrey Wever di presentacion di e metanan di desaroyo sostenibel, e ‘Sustainable Development Goals (SDGs)’, na alumnonan di 6e klas di scolnan basico a inicia aña pasa. E siman aki tabata e ultimo bishita pa e aña escolar 2023-2024. Siguiete aña escolar Minister Geoffrey Wever lo continua cu e proyecto aki. ■■■





PREPARANDO PA E TORNEO DI KINGDOM SERIES CU TA TUMA LUGA NA ARUBA DEN E LUNA DI NOVEMBER 2024



Recientemente, Minister di Enseñansa y Deporte Endy Croes a reuni cu e comision organizado di Kingdom Series, esta Sr. Jessy Beukenboom, Sr. Kevin James y Sr. Angel Tromp. Tambe representante oficial di Koninklijke Nederlandse Baseball en Softball Bond (KNBSB) di Hulanda Sr. Berry van Driel tabata presente. Durante e reunion dialoga tocante e ekipo di Hulanda cu ta participando den Premier 12 di World Baseball Softball Confederation cu lo tuma lugá na Mexico dia 10 pa 14 di november 2024. E 12 miho paisnan cu a keda selecta e aña aki ta entre otro, Merca, Mexico, Colombia, Venezuela, Puerto Rico, Republica Dominicana, Hapon, Korea, Cuba, Panama y Kingdom of the Netherlands.

Den caso cu Team Kingdom of the Netherlands clasifica den Premier 12, nan lo participa den campeonato final na Hapon. E

team lo ta na Aruba di 29 di october te cu 5 di november 2024 y durante e siman aki lo hunga tres (3) wega fuerte. Banda di esaki, nan lo duna nos hobennan dos (2) dia di clinics. Diferente hungado cu tin un status profesional, sea den Major League of sea den Triple AAA di Hulanda, Aruba y Corsou ta formando parti di Team Kingdom of the Netherlands.

Durante e bishita na Aruba, Sr. Berry a reuni cu diferente stakeholder entre otro, Aruba Tourism Authority (ATA), Fundacion Lotto pa Deporte (FLPD), Stichting Sportsubsidie Aruba (SSA), Fundacion Facilidatnan Deportivo (FFD), Instituto Biba Saludabel y Activo (IBISA), Aruba Sport Unie (ASU). Finalmente, Minister Endy Croes ta indica cu e tabata un bon reunion, unda a trata diferente topico importante pa e torneo cu lo tuma lugá e aña aki. ■■■

MINISTER ENDY CROES TA FELICITA E 32 GRADUADONAN DI SCOL PRACTICO PA OFISHI SANTA CRUZ

Diadomingo mainta, Minister Endy Croes acompaña pa su kerida esposa Dilailah Croes – Odor a presencia e Ceremonia di Graduacion di S.P.O. Santa Cruz. E mainta special a inicia cu himno di Aruba sigui pa discurso di Minister di Enseñansa y Deporte Endy Croes. Den nomber di Gobierno di Aruba, e mandatario di Enseñansa a felicita e graduadonan cu e logro aki. “E dia aki ta uno hopi special. E ta resultado di boso esfuerso, disciplina, dedicacion y determinacion pa logra e diploma”, Minister Endy Croes a subraya. Un momento di alegria pa e alumno y nan mayornan.

“Estudio ta hopi importante. Mi ta encurasha boso pa sigui studia, pone meta den bo bida y den bo careda. Esnan cu ta desea di drenta mercado laboral nos ta sostene boso, paso nos sa cu e formacion cu S.P.O a brinda, boso ta cla pa e reto aki. Ta deber di Gobierno di Aruba pa crea un plataforma pa brinda boso e oportunidad pa por educa, desaroya talento y prepara boso pa futuro y ta keda na cada alumno pa traha riba esaki pa por realisa nan meta y logra e miho den bida”, Minister Endy Croes a indica. “Ta bunita pa mira momento cu e alumnonan yena di emocion ta ricibi nan diploma y e mayornan orguyoso di nan yiu”, e mandatario di Enseñansa y Deporte a expresa.

S.P.O. ta brinda e alumnonan e oportunidad pa den nan tempo logra un diploma y pa nan tin un carrera. Desde september 2017, Departamento di Enseñansa a duna un consejo pa cu S.P.O.. Actualmente, ora e alumno caba su di 3 aña di scol, nan ta termina cu e edad di 15 of 16 aña, cual dificilmente nan por continua na un otro scol of drenta mercado laboral. Minister Endy Croes a sigui bisa cu desde aña 2023, el a institui un comision cu a consisti di e ekipo di maneho di S.P.O. Santa Cruz, director di S.P.O. Brazil, Departamento di Enseñansa (DEA), DPS y di un representante di Ministerio di Enseñansa Sr. Carlos Martinus cu a trek e proyecto aki. Na luna di mei ultimo, e mandatario di Enseñansa a ricibi un presentacion y consejo pa haci e estudio di S.P.O. 5 aña, en bes di 3 aña.

Na luna di augustus binidero S.P.O ta inicia cu aña 4. E alumnonan cu a finalisa aña 3, e aña escolar nobo por continua nan estudio den aña 4. Esaki ta brinda nan un preparacion mas amplio y nan por drenta mercado laboral miho prepara. E miho graduado di S.P.O. Santa Cruz ta Josleiny Aquino. E Ceremonia di Graduacion a culmina cu Hora Loca bou ritmo di brassband y DJ. Eli. Por ultimo, Minister Endy Croes ta gradici ekipo di maneho di S.P.O. Santa Cruz: Sra. Sharon Lacle y Sra. Janine Wardlaw – Thiel, staf, docente y mayornan cu a contribui cu e logro di e graduadonan. Alabes ta desea tur graduado hopi exito den nan futuro. Nos ta orguyoso di boso!



Maneho di Idioma:

DI DOS ANOCHI DI INFORMACION PA E MAYORNAN CU NAN YIU TA INICIA KLAS 1 AUGUSTUS PROXIMO

Diahuebs, 4 di juli 6:00 pm na IPA lokaal 4 na San Nicolas

Manera ta conoci, entrante aña escolar 2024-2025, e alumnonan di klas 1 di scol basico lo siña lesa y skirbi na Papiamentu. Lo duna Hulandes cu un acercamento nobo cu ta pas mas den e contexto di nos muchanan. E ta científicamente proba cu si e muchanan forma un base fuerte den nan propio idioma, nan por siña e otro idioma hopi mas facil y miho. Ademas, siña lesa y skirbi den idioma materno Papiamentu lo haci cu e muchanan lo comprende loke nan ta skirbi y lesa y lo stimula nan habilidadnan di siña en general.



Esaki lo ta beneficioso pa e muchanan, mirando cu nan lo bira critico di pensamiento y lo ta mas prepara pa duna nan opinion durante les, den nan propio idioma. Tambe nan por conecta miho cu nan rais cultural. E muchanan lo sinti mas sigur den nan proceso di siñamento, pasobra esaki ta alinia cu

nan idioma materno y nan cultura.

En conexion cu esaki, e mayornan cu nan yiu ta cuminsa klas 1 di scol basico pariba di brug aña escolar binidero, ta cordialmente invita pa un anochi di informacion cu ta tuma luga, diahuebs 4 di juli di 6:00 pm pa 7:30 pm na IPA lokaal 4 na San Nicolas.

REGISTRACION PA PRUEBA DI NATURALISACION

Seccion Examen di Departamento di Enseñansa Aruba ta informa cu inscripcion pa e Prueba di Naturalisacion (Naturalisatietoets) pa aña 2024 a habri.

Pa inscribi pa e Prueba di Naturalisacion 2024 mester registra online pa medio di un formulario di registracion. Pa por haci esaki mester di un Gmail-adres. No por uza otro email adres. Tampoco no por acepta registracion na balie of via emailadres naturalisacion@ea.aw.

Registracion ta habri dia 1 di juli 2024 te cu 31 juli 2024 tanten cu tin cupo pa 2024. Si acaso esaki yena, ta cera registracion mas trempan y/of ta pone bo riba lista di 2024 por si acaso un aplicado a cay afo.

Por favor tene cuenta cu na momento di registra mester upload e siguiente documentonan den pdf:

- un scan (pdf) di paspoort valido;
- un scan (pdf) extracto di registro civil di Aruba (papel di Censo di 5 florin, no mas bieu cu 6 luna);
- un scan (pdf) di e verklaring(nan) otorga, den e caso cu a yega di haci e prueba caba;
- un scan (pdf) di e Certificado di Prueba di Naturalisacion di Papiamentu/Hulandes otorga te cu 2010;
- un scan (pdf) di bo diploma EPB-arbeidsmarkt of SPO y bo



lista final di cifranan den caso cu tin esakinan.

Di e registracionnan cu drenta Seccion Examen ta check si esakinan ta completo. Ta acepta y procesa solamente aplicacionnan cu ta completo. Despues e candidato ta ricibi un email cu ta confirma cu a haya su registracion y cu su nomber ta riba lista pa participa na e prueba.

Finalmente ta ricibi un di dos email pa pasa busca un carta di convocacion cu e fecha, ora, luga y informacion tocante pago pa e prueba.

Mas informacion

Pa mas informacion tocante e Prueba di Naturalisacion y pa e formulario digital di registracion mester bishita e website www.ea.aw. Riba e website ta busca Naturalisatietoets na letter (N) of Prueba di Naturalisacion na letter (P) den e menu di alfabet. Ta conseha tambe pa sigui e desaroyonan pa medio di Facebook of Instagram @educationaruba.

MINISTER THIJSSEN A BISHITA BURGEMEESTER DI LEIDEN

Minister Plenipotenciario di Aruba mr. Ady Thijsen a haci un bishita di cortesia na Burgemeester Suplente di Leiden Peter van der Velden. Minister Thijsen a wordo acompaña na e bishita aki pa Arlene Ellis-Schippers y Judelca Briceño, advisor di Minister di Salubridad Publico y Turismo Dangui Oduber. Di parti di Gabinete di Aruba tabata presente hurista mr. Shandra John y coordinador pa Bienestar General y Cultura Nuris Dabian.

E motibo di e bishita aki tabata e firmamento di un Memorandum of Understanding (MOU) entre Horacio Oduber Hospital y Leids Universitair Medisch Centrum (LUMC). Arlene Ellis a papia riba e retonan cu Aruba na enfrentando riba e tereno di salubridad, capacidad di cuido y specialisacion. Tambe sra. Ellis a trece dilanti e proyecto Happy Lifestyle Center, cu ta un centro unda personan por laga haci un check di salubridad gratis y por sigi un programa di un dietista. Den 1 aña cu e Happy Lifestyle Center aki ta operacional, ya caba e ta conta cu 700 cliente. E Happy Lifestyle Center ta midi resultadonan y asina ta ricibi data valioso.

Tambe durante di e bishita Aruba a trece dilanti e problematico di sigurancia di suministro di medicina na e paisnan Curaçao, Sint Maarten y Aruba. Esaki pa e motibo cu ta prohibi pa exporta medicina cu no ta registra.

Minister Thijsen di su banda a duna un splicacion riba e vision y maneho di Gabinete di Minister Plenipotenciario di Aruba, den cual tin un rol grandi riba cooperacion cu gemeentenan, provincianan, instituto di enseñansa, comercio y embahadanan.

Burgemeester Van der Velde despues di a tende loke Aruba ta haciendo sigur riba tereno di salubridad a bisa cu e ta ripara cu Aruba ta hopi activo, fuerte y tin vitalidad. E Burgemeester a bisa si, cu esaki mester keda ancra den compromisonan concreto cu mester fortifica otro. Tambe Burgemeester Van der Velden a bisa cu Gemeente Leiden ta habri pa mira unda e por coopera cu Aruba riba mas tereno.

Dado momento diputado (wethouder) pa Economia, Conocemento, Deporte y Salubridad, Fleur Spijker a join e reunion. Sra. Spijker a papia riba cooperacion existente cu tin entre Universidad di Leiden, Hogeschool di Leiden y e MBO di Leiden. Akinan segun diputado Spijker ta unda ta muestra cu mester pone e link entre enseñansa y cuido. Tambe sra. Spijker a menciona cu Leiden tin un Healthy Lifestyle Center cu ta practicamente similar cu e Happy Lifestyle Center di Aruba y akinan ta unda cu cooperacion por ta positivo tanto pa Leiden y Aruba.



Diputado Spijker a keda impresiona cu e informacion duna riba e Aruba Health App, cu actualmente ta wordo expande riba e tereno di concientisacion, pa asina e usador di e app tin mas control riba su cuido. Judelca Briceño a papia riba un investigacion cu un estudiante Arubiano ta haciendo conhunto cu Universidad di Wageningen, na unda ta investiga e relacion entre diabetes y e e malesa di Alzheimer. Investigacion cu por produci datonan cu tambe por ta valioso pa Gemeente Leiden, asina diputado Spijker a remarca.

Na final di e reunion a keda stipula cu lo sigi dialoga riba posibilidadnan di cooperacion den un asina yama Sister City Act entre Aruba y Leiden, na prome instante riba e tereno di salubridad y pa despues bai amplia esaki riba otro terenonan. Minister Thijsen a bisa di ta contento cu Leiden ta habri pa yega na cooperacion y cu esaki ta netamente loke ta e vision y maneho di Gabinete di Aruba y cu e ehempel di Leiden por sirbi pa mas gemeentenan. Por ultimo Minister Thijsen a gradici tanto Burgemeester Peter van der Velden y Diputado Fleur Spijker pa e recepcion ameno na stadhuis di Leiden.

2024

AÑA DI STABILIDAD Y PROSPERIDAD



Gabinete Wever-Croes

Ora nos cana den cayanan di San Nicolas cu ta dorna cu artenan mahestraal aki, nos ta realisa cu bunitesa por wordo haya den luganan menos spera. Arte di muraya ta e language visual cu ta conecta culturanan, na unda cu por aprecia historia, color, fantasia y dedicacion.

